



Inatsisartunut ilaasortaq Gerth Mikaelson, Naleraq
Maani/

**Tunami qilalukkanik qernertanik qaqortanillu pisassiissutit pillugit § 37
naapertorlugu apeqqummut nr. 081-mut akissuteqaat**

22-05-2026
Suliap normua: 2026 - 9642
All. nr. 26495356

Postboks 269
3900 Nuuk
Oq. (+299) 34 50 00
Fax. (+299) 34 63 55
E-mail: apn@nanaq.gl
www.naalakkersuisut.gl

Inatsisartut Suleriaasianni § 37, imm. 1 naapertorlugu Tunumi qilalukkanik qernertanik qaqortanillu pisassiissutit pillugit Naalakkersuisunut apeqquteqarputit. Apeqqut suliassaqaqfigisannit akineqartussanngorlugu innersuunneqarpoq.

Apeqquteqaatit tiguneqarneranni tulleriinneri malillugit akineqassapput.

1-mut. Naalakkersuisut qanoq ammaffigisinnaatigivaat Tunumi qilalugartassat amerlinissaannut?

Akissut: Tunumi qilalukkanik qaqortanik qernertanillu pisassiissutit amerlinissaat pillugu Naalakkersuisut pilersaaruteqaanngillat.

1a-mut Piniartut oqariartuutigisartagaat tusaaneqarnerulernissaat piniakkat pillugit Naalakkersuisut piviusunngortinniarnepat?

Akissut: Uumassusilerituut piniartullu oqariartuutigisartagaat misilittagaallu nalinginnaasumik aalajangiinarluni suliaqarnermi Naalakkersuisut pingaartittarpaat, assersuutigalugu pisassiissutit pillugit aalajangiinissaq aalajangiunneqartussaagaangat.

Piniarneq aallaaniarnerlu pillugit inatsimmi § 2, imm. 1, 2) naapertorlugu, allaffissornermi biologit siunnersuinerat nalinginnaasoq aamma piniartut atuisullu ilisimasaat pissarsiarineqarsinnaasut naapertorlugit naapertuuttumik ukiullu qanoq ilinera najoqqutaralugu pitsaanerpaamik atorluannissaq, nalilersuineruilu oqimaaqatigiissumik naliigiissinneqassapput.

Uumasorsiuut piniakkanik misissuinermit atatillugu Naalakkersuisut kissaatigaat Pinngortitaleriffiup piffinni piniartut ilisimasaat suli annertunerusumillu misissuinerminni atortarnissaat.

2-mut. Nunatsinnilumi aamma sineriammi qilalukkat amerliartorerinik piniartut allat oqaluttut, pinngortitaleriffiup killormuanik oqalunnerat Naalakkersuisuniit tusaaneqarneruinnassarniarpat?

Akissut: Takuuk apeqqut 1a-mut akissut.

3-mut. Naalackersuisut piniartut nungusarniarnerpaat?

Akissut: Naamik, piniartut Naalackersuisut nungusarniangilaat aamma tamanna siunertarinngilaat.

Inatsisartut inatsisaanni piniagassat naleqquttumik uumassusillillu eqqarsaatigalugit illersorneqarsinnaasumik iluaqutiginissaasa qulakkeerneqarnissaat siunertaavoq. Inatsisip aqunneqarneratigut eqqortinneqarneratigullu pisuussutit pigiinnarnissaat kinguaassioqqissinnaanissaallu pingartinneqassapput.

4-mut. Piniartut nungusagaaniangippata Naalackersuisut nunatta inuisa pingartitaat aallaavigalugit avataaniit killilersuisunut sukanganerumik avammut piunasaqaateqartalissanngilagut?

Akissut: Uumassusilerituut siunnersuineri Naalackersuisut tigusartagaat, assersuutigalugu NAMMCO-mit aamma Qilalukkat pillugit ataatsimoorussamik Ataatsimiititaliamit (JCNB) siunnersuinerupput. Qilalukkat qaqortat qernertallu pineqartillugit, Naalackersuisut aalajangiisuusumik oqartussaapput. Attuumassuteqartunut tusarniaaffiusunut pisariaqartunut tamanut tusarniaanerup kingorna aalajangiisoqartarpoq. Nungusaataanngitsumik atuinissaq pillugu tunngavik aallaavigalugu Naalackersuisut sulisarput.

5-mut. Piniartunut atugassarititaasut pitsanngorsarnissaannik Naalackersuisut suliniuteqarpat?

Akissut: Tunumi immikkut ittunik ineriartortitsinermik suliniutinik ukiuni arlaqartuni Naalackersuisut suliaqarnikuupput. Immikkut ittumik ineriartortitsinermik suliniutit taakku Tasiilami aalisakkerivimmik pilersitsinermut atatillugu ataqatigiissaagaapput. Suliniutit ilaat ataaseq tassaavoq, Tunumi umiatsiaaqqat aalisarnermilu atortut allat pillugit qinnuteqarnermut immikkut ittumik Tunumi aalisartunut piniartunullu tapiissuteqarnermut aaqqissuussinerit.

Taamatutaaq isumasioqatigiinnerit arlaqartut ingerlanneqarnikuupput, taakkunani eqqartorneqarsimallutik ineriartortitsinermik suliniutit najukkami qanoq iliorluni piviusunngortinneqassanersut.

Ittoqqortoormiini puisit amiinik tunisisarnermut atatillugu Kommuneqarfik Sermersooq-llu 2025-mi oqaloqatigeereernerup kingorna amernut qassaat atuuttussanngortinneqarpoq. Aammattaaq umimmaat amiisa qiviuisalu suli annertunerumik atorluarneqarnissaat pillugu 2024-mi pikkorissaasoqarpoq.

6-mut. Inuit pisinnaatitaaffiisa ataani nunap inoqqaavisut pisinnaatitaaffigut Naalackersuisunit malinniarneqarnerpat?

Akissut: Aap, nunap inoqqaavisa pisinnaatitaaffii Naalackersuisut malippaat. Tunumi qilalukkanik qaqortanik qernertanillu pisaqaqqittoqannginnissaa pillugu innersuussisoqarnikuugaluartoq, qilalukkanik qaqortanik qernertanillu pisassiissutit attatiinnarneqarnissaat pillugu Naalackersuisut aalajangiinikuupput. Taama iliorpugut neqinik nutaanik pilersuisoqarnissaa pingartuusoq, imminullu pilersornissamut periarfissaqartoqartariaqartoq isumaqaratta, naak maannakkut pisassiissutit

kissaatigisanut naammagunangikkaluartut taamaattoq neqinik, mattammik orsumillu pissarsisoqarsinnaavoq.

Inussiarnersumik inuulluaqqusillunga



Peter Borg

Aalisarnermut, Piniarnermut, Nunalerinermut Imminullu Pilersornermut Naalakkersuisoq